

corps, que la fille demandera pourquoy on la fait mourir que le liure du bien & du mal s'ouurira, que le Ciel se despoüillera, que le feu d'Enfer paroistra, que le Paradis s'ouurira. Alors les ames sçauront le bien & le mal qu'elles auront fait. Le iure par les planettes, par l'obscurité de la nuit & par la clairté du iour, que les paroles de l'Alcoran sont les paroles du Prophete aymé de Dieu, puissant auprès de sa diuine Majesté; vous luy devez obeyr, il est tres-fidelle obseruateur de ce qui luy est commandé, il n'est pas demoniacle comme vous auez estimé, il a veu l'Ange clairement & sans enigme, & n'est pas en peine du futur, les paroles de l'Alcoran ne sont pas les paroles du Diable, de quel costé que vous vous tourniez, il n'est que pour instruire le peuple, & ceux d'entre vous qui voudront suiure le droit chemin, mais vous n'aurez pas la volonté de le suiure s'il ne plaist à Dieu Seigneur del'Vniuers.

Les Arabes enseignoient leurs filles toutes viues, lors qu'elles auoient fait mal.

LE CHAPITRE DE L'OVVERTVRE

*du Ciel, contenant dix-sept versets,
écrit à la Meque.*

AV nom de Dieu clement & misericordieux. Les ames cognoistront le bien & le mal qu'elles auront fait lors que le Ciel s'ouurira, que les estoiles tomberont, que les mers s'assembleront, & que les tombeaux s'ouuriront. O homme! qui te rend si su-

perbe que de s'eleuer contre Dieu qui l'a crée, qui l'a formé & proportionné de telle façon qu'il a voulu? O impies, vous ne voulez pas croire le iour du Jugement: Il y a des Anges qui obseruent ce que vous faites, & qui sont obeissans à Dieu; Les justes iront en Paradis, & les injustes seront precipitez dedans le feu d'Enfer d'où ils ne sortiront iamais. Je ne te diray pas quand sera le iour du Jugement, ce iour personne ne pourra secourir son prochain, & Dieu seul commandera.

*LE CHAPITRE DE CEUX
qui pesent à faux poids, contenant trente-six
versets, escrit à la Meque.*

AV nom de Dieu clement & misericordieux. Ceux qui pesent à faux poids, & qui mesurent à fausse mesure, ne croyent pas de ressusciter au iour que tout le monde s'assemblera deuant Dieu pour estre jugé. Certainement le liure où sont escrits les pechez des meschans est gardé dedans l'Enfer. Malheur sera sur les infidelles au iour du Jugement, personne ne doute de la venue de ce iour que les impies, lors qu'ils entendent prescher les commandemens de Dieu ils disent que ce n'est qu'une vieille fable, l'impieté les tient dans cette erreur, & les fait abandonner la loy de sa diuine Ma-